

Pendaki OKU tawan Gunung K2

Ravichandran dinobatkan sebagai rakyat Malaysia pertama tawan gunung kedua tertinggi dunia itu

Oleh **MOHD RIDZUAN ABU HASSAN SHAH ALAM**

Pendaki solo orang kurang upaya (OKU) negara, T Ravichandran dinobatkan sebagai pendaki pertama rakyat Malaysia yang berjaya menawan gunung kedua tertinggi dunia, K2 di Pakistan pada ketinggian 8,611 meter.

Pendaki berusia 57 tahun itu tiba di puncak gunung tersebut pada jam 10.50 pagi, Jumaat lalu bersama lima pendaki solo dunia lain diiringi lima malim gunung.

Sebelum ini, Ravichandran

telah melakar sejarah apabila berjaya menjejakkan kaki di puncak tertinggi dunia, Gunung Everest berketinggian 8,848 meter untuk kali ketiga pada 12 Mei lalu selepas 2006 dan 2007.

Dalam satu kenyataan pada Ahad, Ravichandran meluahkan rasa gembira dan bangga di atas kejayaan tersebut.

"Saya berjaya kibarkan Jalur Gemilang di puncak K2. Tanda semangat kemerdekaan yang seharusnya rakyat Malaysia tidak lupakan pada 31 Ogos depan.

"Semangat cintakan negara, hidup dalam aman dan harmoni. Itu kunci perpaduan yang patut disemai dalam jiwa di mana ia menjadi kekuatan untuk saya harungi kesukaran sepanjang pendakian.

"Terima kasih kepada isteri yang tercinta, anda adalah kekuatan untuk saya berjaya. Tidak lupa kepada keluarga, rakan-rakan, penaja-penaja dan rakyat Malaysia yang mendoakan kejayaan saya sampai ke puncak gunung itu," katanya.

Menurut Ravichandran, menjadi seorang OKU tidak memperlihatkan dirinya lemah, tetapi mampu berjaya dengan membina kekuatan dalam diri, setanding dengan orang yang sempurna.

Tambahnya, tiada yang mustahil untuk seseorang itu bangkit kembali jika terjatuh.

"Itu pengalaman pendakian yang saya tempuh dalam ekspedisi kali ini. Ini hadiah saya buat rakyat Malaysia. Merdeka!" katanya.

Sementara itu, Timbalan Menteri Perpaduan, Wan Ahmad Fayhsal Wan Ahmad Kamal berkata, ia merupakan satu kejayaan yang luar biasa dan perlu dibanggakan.

Tegas beliau, semangat dan jiwa Ravichandran perlu dijadikan contoh teladan untuk anak bangsa di negara ini.

"Kejayaan Ravichandran sudah pasti merupakan antara hadiah tidak ternilai untuk bulan kemerdekaan nanti," kata beliau dalam Facebooknya.



Ravichandran mengibarkan Jalur Gemilang sebaik tiba di puncak Gunung K2, Pakistan pada jam 10.50 pagi, 22 Julai lalu.